

四庫全書

集部

欽定四庫全書

集部

榕村集卷三十四

詳校官侍讀學士臣法式善

助教臣常循覆勘

總校官知縣臣繆琪

校對官學正臣翁樹棠

謄錄監生臣鄒世俊

欽定四庫全書

榕村集卷三十四

大學士李光地撰

祭文

祭河神文

年月日告于永定河漳滏漳河暨順天保河十五河之神曰此年

聖主勤念民災廣修堤岸荷神休佑三載于茲卑濕之

場盡獲豐稼明德遠矣神功懋焉今歲入夏以來雨澤
孔多挾以晉豫洪流河防往往危潰雖天道之有愆恒
知神心之無悔怒伏祈乘茲秋令肅以金風淫潦不降
駭濤不張千里坊壩永為民蔽完者以固缺者以苴無
墮靈功幽翼

聖世我吏民其敢懈歲事以忘神貺謹以剛鬣柔毛清
酒之奠望伸禱祈尚饗

告關侯祈雨文

二首

維年月日告于歷代加封大號漢闕侯之神曰維神義
勇於昭靈威有赫感通既顯位業斯崇自地承乏畿輔
肅恭象教雨暘雩禱靡祈不應茲者靈雨愆春炎光屆
夏旱將太甚田懼卒荒

廊廟憂勞百僚震恐每聞殷動之聲未獲滂沱之賜昨
者得

旨於朝咸

命各仲虔禱俯思祈望匪神孰依跪薦寒流仰干震豫

維神千世萬世福國庇民名山顯位神得追之星躔月
離神得回之呼翕陰陽暫攄浩然之氣周沾中外立覩
沛若之施用濟斯哀哲以佑我

國家不勝懇切以待靈命

又

自春及夏時雨沾足來牟豐登稻田暢茂非神休祐曷
克躋茲今蚤播之穀已獲全穫猶有下種稍遲者尚須
雨澤旬日以來微覺暝乾昨宵疎雨飛零未得沛然之

效誠恐膏潤不繼堅粟難期一簣之功羣望神賜嗚呼
霄請之節禮不敢於祈頻而哀愍之情義可通于禱久
恭叩慈靈不勝悚切

告關侯祈晴文

二首

維神靈威於赫主名山川廟食於茲萬室攸賴今春自
人日以後陰雨連旬既沾既足勢猶未厭麥秋將至懼
沈浸之為災又恐播穀非遙或愆伏之互乘恭惟一方
有稷神人同憂敢丐神靈力收宿靄憫茲民命迄用康

年地與紳耆等不勝合誠祈禱之至

又

今歲自春徂夏每以穡事仰干神惠曰暘而暘曰雨而雨麥稻豐穰翳神之賜茲冬稼及晚種碩大堅粟於前有加如得一月無災庶幾千家有望旬日以來沱雨頻降誠恐黃熟之後遇霖澤以更生又慮積陰之餘致大風而隕籜恭惟烟雲滿望豈人力克致茲休宜令京抵興歌庶神功終竟厥事亟收浮潦用濟築場邦人不勝

幸甚地抱疾未能親叩神前謹遣弟某代伸祈禱謹告

丙申四月九日祭關侯文

順治紀年乙未之歲大寇攻家老幼係累時余童稚從父之季叩禱神前靈筭三蹶三之又三至于十二其兆不改云家無事神且余從主我家內身方在囚安得幾會猶豫狐疑或祈之贅丙申是日仲父為帥覆賊高山有戰無潰三月以遙鉦鼓聲沸肉骨生歸像教迎致果符前兆龜誠有智自是以還相我無貳迭出精英驚噩

夢寐談易之屯示日之晦瀕危以安恭惟神惠大撓干
支六十相配是年月日豈敢忘墜越代感通神理昭昧
沈想幽明天命是畏潔牲薦酒樂侑神醉小大稽首共
聽機瑞赫赫威容我我顯位保我終始無作神愧

丙申七月七日祭關侯文

昔家遭難乙未夏季丙申初秋纔釋係累母夢神言斷
無死理立夏立秋乃事終始四月之九迄於七日十口
繼歸於是完室神許活我又肯適我寒家何修公以為

可六十年間靈爽相追謂余不信驗以風雷逮余仕路
彌荷神警投老休居不忘深省今夕何夕雨過新涼層
雲高褰漢亦有光迴念是日甲子當對爰載潔牲以答
慈衛兵戈之中父伯墨戎季則同繫閔予于凶鳴鳥恩
勤鵲鵲赴難神眷既專家風未散今俱還真在神左右
設位東西偏神以侑其有存者元戎六甫出入戰場口
作家譜率我諸昆羅拜于前村童雜劇聊以喧闐女罷
機杼牛不服箱神且遨嬉樂歲豐穰

御賜急公尚義扁額恭懸告文

年日月敢昭告于小宗初祖旌義賜爵樸菴府君之靈
曰維吾祖厚德天植為家發祥自少至老樂善無荒鄉
國歸仁譽命上逮餘澤殘膏子孫是食流大枝繁實惟
祖賜在前朝曾采于史傳而當宁未聞於褒嘉光地適
以求休邂逅面

聖奏述祖勲遂蒙

額錫光遠有耀歷久彌彰積善餘名時乃天道昔人自

喜功德者一勒山上一沈漢淵何似吾祖

天語昭揚鎮在嶽麓表厥宅里祠廟高懸瞻仰萬衆今
諏吉日奠告恭掛伏惟祖靈祇受歡喜於戲垂裕後昆
既席舊德無念爾祖宜勉新猷凡我子孫有不力田孝
弟詩書禮義之是守者匪我族類祖其明譴

丁酉還朝臨發告祖文

年月日敬告于四代祖考妣之靈曰地以年例丐休僅
得

予假今又前期

旨趣至于再三畏此

簡書義不敢緩黽勉俶裝即以今日啓發松楸戀重

廷闕恩深二事交胸寤言不寐恭惟祖父德澤庇後神靈在天惠以光明完其名節使之進退不謬於古人之義兼以繼述得修吾祖考之遺遊既有方出則必告伏惟垂佑不勝懷慕之至

祭阜卿叔弟哀辭

伯兄自官署致哀辭於功受貢生叔弟阜卿之靈曰嗚呼人亦有言莫如兄弟若我同懷之數人又非尋常之可比蓋自幼而艱危齊吞身于虎兇歷奇嶮於未經囚大幽之無底我以居兄備受撻捶汝尤撻克行刃必擬蒙祖考之遺祐脫性命於斯須非家門之和濟詎有生之理乎既稍長而學業吾課汝以攻書能盡誦夫諸經出頭角于隊魚逮我既達而寧親倏遘閔亂于倉卒海揚波而浮鯨山伏莽而張獘我墨衰以從戎弟儒衣而

戰血帥滿百之烏聚驅盈萬之獸獒夜阻雨於山谿衆
憂命之難活弟擁盾以不退賊晨視而不敢發遂離散
以追犇經七日而破滅自是有役弟悉代之內嚴里鼓
外濟

王師功聞于朝選造有期田園迂癖十畝自嬉嗚呼自
我再還

闕庭一十八秋念我同生曷云無愁昔因老母之須奉
後緣汝疾之未瘳欲致汝以速至空盡歲以遲留愴蕩

豆之不具今原隰焉是求雖欲悔其可追吾實為之而
又焉尤嗚呼吾之此來上負

深恩下慙素履徒割情於所親歲紛紛其聞赴廢莪草
之哀謳寄脊令之永慕矧諸父與諸兄皆溘盡夫風露
痛越鳥之北栖望嶺雲而南訴有幸返於松楸何術起
乎泉路信吾行之負於神明俾骨肉盡愆於禮數豈獨
哭汝而悲長沾纓於岵岵敢不念先人友愛之言使汝
恬然於兒女之顧嗚呼哀哉汝其知之

告長兒鍾倫文

嗚呼兒生而聰敏稍長而醇孝十歲以上祖父母父母之病憂愛徬徨出於天性湯藥烹煮必身親之其均調水火之節雖婢僕之老於侍奉者不能及或憐其幼小慰而驅之暫去而復來至於夜分不懈蓋至成人如一日也其於伯叔祖父母伯叔父母悉能推父母之心致其敬愛疾病患苦匍匐救之見義而疏財自推食解衣至于讓產皆以行之為樂不獨無難色而已吾審其至

性如此而又穎慧能文故竊期之以大就之事不謂其
行業未成而僅止於茲嗚呼豈非吾行負神明而使汝
得天之厚者默損潛消於冥昧之中耶病革矣與吾言
既而寄我以書拳拳於改過遷善冀異日之有所立有
所聞者垂絕而一語不亂嗚呼齋志以沒汝其然矣以
汝之學植文藝家鄉行蹟文而張之豈在人後雖然吾
有志於行古之道雖先世美行猶不願為夸飾況子孫
乎親友有問吾以汝之行耆吾辭焉惟戒汝姪輩以收

汝之書存汝遺文吾幸而未死撫汝之孤勗而教之苟
一二有所成立以繼汝之志則與汝之自力以傳者無
異而汝可以不腐也嗚呼哀哉汝以三月十一日亡於
保定旅店二十五日柩至京師寄於西門僧寺痛我執
掌不得伸其哀四月初四日乃得憑柩而一慟焉嗚呼
父子之親至是而魂神始交初六日昧爽我徂西郊假
寐車中汝來相接汝不暇悲感而但憂吾憂吾亦坦然
忘哀而開汝以前路謂上天下地其理則一苟性靈不

泯豈以死而迷謬汝聞吾言領首以對遺書一卷似欲
詒汝子者未問而僕夫噪呼吾遽然驚覺矣嗚呼哀哉
異氏之法名曰超度是耶非耶果其有之夢中所言乃
第一義矣吾當省愆補過以卒餘期汝亦當慎之於其
無所不之焄蒿惻愴長與我而相依輔余之志相爾之
後百年朝暮知合并其有時嗚呼哀哉

贊

易贊

易之為書源流已遠至于近今為說家滿衆星繁繫必
辨緯曜羣言紛錯孰執其要我論聖統則折諸賢胡心
是師曰余單傳折中賢者又以聖斷聖雖邈矣微辭有
爛聖欲加年愚者須幾徒有日孳至斃乃已緬繹聖訓
觀彖可知姬公有言文王我師故知稱名始自文考憂
患有興繫辭已曉六爻之作於是取材位之凶吉時哉
時哉夫子之傳莫先於彖彖意既得爻斯過半其次釋
爻片言摘抉夢寐周公如合符節大象之立推類廣引

或離卦意皆卦之緼載稽三傳祖文宗周又通其象使
理周流復總全經通論其要易簡之精乾坤之奧河洛
苞符著卦圓方繫辭義例學易典常廣大精微著明深
切如網在綱若車有轍厥後三篇出自河內圖隱象湮
千載明昧首定其類次變其通序之雜之觸長斯窮

顏子喟然歎章贊

顏氏庶幾去聖一息觀於喟然其意可得夫子誘教竝
時三千知其善者曾有幾焉詩書執禮衆飫其說識其

為我斯足以發求畫中道由誦終身有休之志無日之
新曰力不足曰書可廢是不能竭匪才之罪譬之飲食
知味斯嗜譬之登踐憚勞曷至顏子嗜之曰子善烹顏
子至之曰子善程顏曰善誘子曰好學鼓舞之神千秋
孰覺子曰不惰顏曰竭才自非大勇孰與此哉好生於
誘竭由於循不謂己勉實聖恩勤至於欲從依然不能
雖復末由豈以才謝揚雄有言顏苦孔卓茲其苦也所
以為樂欲從末由匪病其艱正謂竿頭妙不容言孔至

七十欲不踰矩欲矩之間如毫髮許孔顏之從其欲則同所嗟慕者中道從容窺顏之心在於兩欲罷無修蹤從無止躅此外惟曾任重道悠子思繼之至誠無休孟子亦然所願孔子壽夭何疑修身以俟我觀聖賢惟在不息不息之至便達天德讀顏此章此意須通作超悟語則墮禪宗

諸葛武侯像贊

王佐不生于茲千載鄒魯羣聖靡遇其配天恐臯伊其

迹眇芒欲修厥業而世未昌岌岌晚造鼎運難移聊使
先生為臣之師先生不降蕭管立極霸圖施張邈矣王
澤先生之道足俟後聖紫陽伊川莫敢改評誰追軌躅
誰識容光我撫史書以命長康

關侯像贊

操歎義士瑜曰虎將遼允忠信蒙稱鯁亮超羣逸倫勇
而知義誠非韓信黥彭可方周旋間關死而無悔不使
季路仇牧居上拒江東如叱狗俯河朔若吞象摧良十

萬報曹以去大厭中州人士之心沒禁七軍興劉垂成
幾慰故都父老之望功有毀敗義無虧喪沔水秋風空
齊恨於渭濱宇宙大名直竝垂於漢相

朱子像贊

堯舜之道二典僅垂孔氏六經至秦而灰漢唐之間道
墜文喪董韓王楊晨星相望宋之中葉其學大醇及乎
夫子程周彌尊開聖之嚴憂世之厚顏瀾稽天獨執其
咎刊去枝華務見本根菽粟麻絲至味大文肆開堂戶

示我與宅苟有能者便達天德於戲五百之運歷古而
同建武貞觀一時之功天為萬代金口木舌夫子之生
于湯有烈方明之初一術專師風流篤茂夫子是資詭
說汨之於聖則畔夫子道微貞元亦散孰陟嵩華越彼
平岡孰能涉海而棄舟航夫子之道與時屯泰婺女之
墟光耿長在凡我后裔瞻仰來茲古人有言心嚮往之
謁朱子武夷精舍贊

道斷堯舜昌於夏殷不有夫子墳索荒榛絕學有繼濂

洛關閩朱子不生諸家亦堙嫠女之鄉斯文所屬有耀
於他宅此夷曲俾我後人如夜斯燭彼岵者壇望陟相
續五十餘年鑽仰末光腐草薰蒸煥動飛揚微卉後春
援我手強螟蠹非類祝我聲轟受茲罔極夢寐慨只自
棄高山云何德否庶幸暮年瞻仰視履先生有靈式邁
其軌

菊花之隱逸贊

采采黃花于彼霜下誰其尸之晉之逸者喻彼生時春

過夏殘秋風拂衣白露為餐粲粲芳馨今也蕭艾不有
幽香巖谷何賴

自贊

瞿瞿而每涉於驚波蘇蘇而終已以勞歌惟哲人之玉
於礪信乎頑石不足以礪獨丹鉛之有癖或在險而平
過吾聞之也高山仰止不知景之無多

箴

勸學箴

易與詩書最務精熟三禮三傳隨分誦讀西京東京文
極醇厚唐人之雄曰韓曰柳北宋文章於唐有烈歐蘇
條達曾王峻潔擇其尤者含咀英華將來融洽不名一
家諸子之粹亦可采焉荀卿論學莊子譚天仲淹中說
子雲法言偉長中論康節外篇與指奇辭手錄心追醇
疵小大默而識之周程張朱至為精鑿孔孟通津經書
正鵠易通正蒙性書學論以逮雒閩微言至訓竝須熟
講益以精思篤嗜深契尚友遙師義理昭明庶幾不畔

窮經觀史靡不貫串猶有餘力列代詩騷搜春擷卉以詠以陶如是讀書方有根柢文學德行實相表裏

惜陰箴

武公九十猶曰小子伊川涪還聰明未止須知聖賢何故如此後之學者志逐氣衰日是之離云胡不摧心無退法乃與道歸待文而興匪直也民廢於中塗千載同淪自知是勵昔人所尊先病後瘳蓋喻晚節人能自新鬼神所悅新之又新咎戾斯雪榮華顛顛誰其免茲消

息盈虛委命于時惟是善惡不可不思一夕之旅便仰
顏色樊鳥羈牛心焉安息一朝終身君子是擇念來無
端書之無緒天者難明我也無具分陰可愛上哲亦懼
誠家後箴

少小之時謙謹是尚動則畏譏言則懼謗傲不可長志
不可蕩使人視之如璞未錫毛詩有言維莠驕驕童子
佩觿古人所嘲柔顏捫舌賢聖猶勞矧爾小子而敢矜
高父祖艱難供爾衣食便自放肆而忘檢飭性既漓薄

金史卷之八十二
卷三十四
質又乖逆幾何不為敗類凶德湖山諸子驕慢成風汝等又然恐替吾宗今與汝約改過於蒙再罔悛心吾不爾容

銘

御賜研銘

有御書以靜為用是以永年句恭書其後

靜而延年仁者之厚我

皇克之箴此座右臣拜稽首

天子萬壽

砥石硯銘

一名松花石

用汝作礪牛角相屬元德既升巧匠斯琢賜等夏后之璜價重荆山之璞

旋心羅文研至難得友有餉余者銘之

廓然虛心窈兮圓神此老氏所謂其中有真非東坡指為物之病者以取妍於人

歛石研銘

徽為子朱子之鄉歛石出焉茲其所以可貴而近頗稀

傳惟識者能購其真以為堅潤殆過於端世方競紫夸
綠而孰知守吾之玄

月印清溪硯記

此硯前代周藩府中物王極愛惜之裝匣以藏題曰月
印清溪遭亂匆遽登舟百物棄捐獨呼內豎歸取研比
至而追王不及矣流落民間然猶懷研不忍棄後為劉
君太乙購得今以贈予劉君時讀書翰林能詩博雅士
也

榕村集卷三十四

欽定四庫全書

榕村集卷三十五

大學士李光地撰

詩自選

家居寄友

乙丑年

昔也歲上章始擢春明第讀書二十七吾子最年穉頑
然玉未剝祇見石麓礪又如未調馬往往肆踰噬惟我
識兄真同稠多卻避稍稍論經書兄從質凡例或其中

所感有泚下沾袂至于三年久直諒無所畏不是申振
剛翻覺魏徵媚困頓已必千憤悱人無二先聖思狂簡
卓爾見高致我去省晨昏兄追水之滋夜飲張家灣盤
臠手自膾摻路號失聲茲情安可替回首纔經春妖星
明造次閩關閉不開君友道茫昧兄見蠟丸人把握共
拜跪云汝非臧獲嘉爾壯士誼七載重相逢悲喜不能
視徐徐抽舊編簇簇立新義兄輒折我角我且盛兄氣
我有烏烏心懷之未能遂假兄為眡兆指期若執契饗

母及小人明時真錫類勿復言蔡功心恐慚柳惠緬憶
出京師兄役垆野外悠悠竟長河濯纓有餘懟明魄幾
昭蘇星霜四清厲念子何當親離憂慘中肺余季至幽
都蒙兄傾腹示持回古絕句照見相思淚知我遊所懼
問我何所遺我近營一區乃不在高銳平野出清漪密
葉交重蓋窪突自然有曲折參差會側右為小山今始
覆一簣欲起地下脈乘高穿石淥下有三株榕其初本
一植此物遇摧偃著土便為帶不知何代風顛狂南北

吹遂令不斷種夾澗相膠纍蛇作雙橋通聯成一幄翠
喻我二三子炎朔生而異雖然齊幽根盈盈一水離何
用寄所欽歷錄收我笥謝翁居閭門夢我奉冊秘其間
第二章三經而九緯檢押盡琳琅拳披蚪蚪字上言翁
不知下言夏后氏一卷獻

當展宛如夢所紀未必膚末學不謬作者意三篇河內
文陋哉講師蔽前輩蕭泰和近年王諫議穿穴各短章
區區重補綴難忘三益心頗有四方志限迹吾未能鳴

呼名山閱吾子千古交直道冠氣類將煩鍾子聽遂斷
獲人鼻庶幾決否然用自知己未批糾有報音從此跂
予遲

遊成雲洞

戊辰年正月用朱子登
蘆峯韻時方疏詣侍養

溪深樵路微峯迴面勢盡涉亂渡雜沓探崖窮攀引村
火蔽烟樹居然成異畛寒篠釣沙黃竒石剝山磷霽色
限霜飈清聲絕蟲黽昔我營茲村高天風息緊修途節
又弭直徑步方窘白日照歸鳥和風罷征隼況是日邊

書取次浮名泯有願斷金芝無心聯玉筍一諾在山靈
皇肯為微允八風正鳴條四節時在蠡冠童真五六日

暮命歸軫

時同遊長幼
凡十一人

甲子南巡恭紀

已巳年衍聖
公命題分作

燔柴躋岱巘舍菜戾宗祊獻愷方於泮升中告厥成巾
車陳

法駕大馭假行旌望望觀風意遲遲采俗程徒遵時邁
迹那有登封名嶽瀆公侯配山河帶礪盟懷柔均載德

設險竟銷兵，目擊波臣順。興言禹績宏，遂臨牛女次。還
稅虎龍城，禮致鍾陵重心。忘磬折輕朔風，吹返旆白露。
湛寒英訪道，思方切崇儒意。獨誠宅仍生所，里堂儼夢
時。楹入廟，申芹薦隆賢。肅鼎烹師存宜禮拜。

帝用作歌聲，汴統休公旦。傳薪偉孟卿，豐碑齊屹立。巨
榜繼高擎，先後叨明典。存亡感至精，恭惟

天子學實共聖賢，并枯植紓皇。豫泉源啓睿，情人如根
不朽。天與水流行，微義昭雲漢。貞珉列瑰瓊，章懸羣象。

仰貺動百神迎匪獨斯文煥時當大道亨

家山公兄以南海神廟碑見貽漫賦學韓體

癸酉年

吾宗宮詹探嶺梅銜命秩祭廣利迴走勞道途言語畢
乞得韓碑驚復猜此文熟讀四十載曾聞故刻尚崔嵬
年深豈免點畫缺觚稜應久混莓苔入眸了了從頭讀
想像鑄工初下鋤公之此時自潮海量移楚嶠方徘徊
鱷魚驅去鬼神避衡嶽延佇停霧雷巨靈竦息仰宗德
文章一字卻千災碑成自合歲稔熟孔公德政亦甦哉

岐陽石鼓埋荒草吉甫山甫知誰裁岫嶺山頭隱科斗
聖跡茫昧公所哀豈如此碑垂千載文完字好光皚皚
當日慕古多憑弔安知天壤大名開吾徒辛苦同羈宦
匝月緇緇對寒煤一尋再閱動光彩有若岱頂披雲堆
字兼顏柳存隸體陳諫何人亦不灰煖茗澆腸更屬賦
卽事標題興已恢東牕紅日儵暍靄颯乘麟自天來

送唐偕藻宗丞致政

丙子年

先生其鴻鵠寥廓不可蹈有似無心雲翻飛返峰嶠曩

者辱鄉賓相看各盛貌如何素髭滿枯槁若同調山鳥
問歸意嶺花向人笑越水橫灘高舟子喜相勞屈指到
霞浦晚色正炫耀陶菊媚秋霜柳橘銜夕照海霧避山
樓谿風親野棹孰測冥冥蹤坐令羈者悼往歲不自知
共談陳與邵時哉惟先生斯覩象之奧溥雨暗陰沈款
扉以行告撫迹祇含辛檢篇方廢蓼未能餞青門何以
慰長道曷日託丘山願執侯芭掃

歲杪戚友頻集寓齋同限韻四首

丙子年

一年光景疾於箭四壁殘絃空復存手縮無心開古瓦
步頻有客對芳尊南中遇臘尋冰噍野外終冬看火燭
何為霜風簾帟裏非關誦講不窺園

天涯急晷動寒風串戚依依對影同羈旅十年雙鑷白
鄉賓何日共披紅地連碧水人非遠釀識金蒲酒倍工
南嶺臘前梅蕊發他時莫負訪春融

鄉同年陳宜亭同
安人邑出金蒲名

酒

羈宦躊躇忘歲月鈎輈遮莫響南園徂年髩逐銀華長

一夜庭空木葉繁霜厚兼貪凌老瓦月寒偏肯照貧門

與君邑里還葭附連榻韋編理細論

陳介石同縣姻親雅好譚易

寒曦冉冉到除邊匝月風霜特地全同志即今為勝日
高情自古付流年伴人蟾影強如燭報歲春光不計錢
便是枯腸搜索盡無那霽色又連天

送杜大宗伯致政與諸子限韻

庚辰年

先生在朝著荆國之純璧胡然遂抽簪太室方嘗麥比
者轄中樞亭立掩孤柏真氣充以腴獨覺寡物役晚出

欣服案託附比蘿薜晨夜春風中日月豈知積有時同
吟咏中之討墳籍每造拜賢郎待我匪賓客醇意何薰
人薄夫不能釋三月帝京遨桃杏正紅澤詩字出莆田
鏤錯精可擇先生發吾藏閒月勞履舄頃刻成工妙至
今有餘跡賤子自憂艱三春避廣陌先生每惠顧賤子
慰居索塵勞又四載夢寐想風格攜杖孰追隨北望西
山碧元臣既拂衣顧我何補益迢迢望越絕扁舟何日
刺權公文道新鄴侯仙姿昔借問祖青門千秋誰燁赫

遲任惟求舊典型詩所撫先生慙行行曠禮在朝夕東
觀有遺憲上庠貽簡冊蒲車行殷路臯比非久隔炎曦
熱天動夏嶂連雲擘驅馳久頗賴思公聊捲帟風雅蚤
說詩行藏晚學易臨風懷寥廓何處尋六翮從來世三
公未曾厭清白

梅定九自南至諸子從學中西算術悟性強力各
有所造以其暇日談文賦詩喜而有作

癸未年

交我十載前惠我十載後幽諾未云踐晤期固非偶徐

魏嚮然臻陳氏集昆友雖無廣亭榭西軒舊槐柳雖無
飲庶幾滄易致佳酒繫我煩委暇聊來共尊缶或邀步
華池秋風驛路口年運逌犇馳六藝缺復久諸子意未
衰斯文幸已厚吾少也無能今老亦奚有忽見弟子師
古道生白首涼色入新郊素光昇遠藪唱咏日未厭申
篇夜還趣王事驚我埤先業賴茲守況復喜晴獲披衣
望星斗

新安舟次

甲申年

撥霧追星入海堧荒管盡處水連天平生不作登車夢
八載何曾穩枕眠吏部祇應抽手板蘇州詎忍利餐錢
書纔有味身將老歎息宣尼欲假年

劉子青藜太乙以前代周府寶研見遺其款云月
印清溪與友限韻有賦而失稿矣劉子索觀不得
記是歌韻聊復占此

丙戌年

疇昔汴州亂賢王犇渡河蒼黃盡割棄一研所愛頗登
舟還遣豎追程遂蹉跎流落數十年舊事記不磨猶能

言題識明月印清波劉子中州秀好古劇沈痾邂逅得
手把感慨為哀歌售之寶行箱贈我情何多著墨刀削
似映燈星月羅清溪是吾邑嘉名喜無謫余生寡所好
對此良摩抄叨承太乙惠將奈七畧何

讀唐宋名人詠諸葛武侯詩與諸子限韻三首

丙戌

年

武侯誠龍德潛卧天地否一歎渺無儔名浮猶有恥置
身管樂間后稷平人爾遇主煩三顧託孤寄千里普天

困豺狼一民悲有死王佐久不生此心誰與比才美戒
吝驕器大斯儉禮所以大賢度抑抑以終已不見烈如
火但見平如水惠政流甘棠佳兵聞苦李原公茅廬初
躬耕沒則已翳翳成都桑百代頑者起前輩盛謳歌微
辭安足齒雲羽動儀型高山勞仰止載覽季興編一竟
三歔唏

賢聖三季後十九生屯否或以晦避禍或以遯遠恥武
侯居南陽其志聊爾爾公威能一郡士无非百里公則

笑無言不遇寧守死無奈龐馬摧姑且管樂比豈曰知
己恩難者訪賢禮一洗虛聲辱幡然不為己欲吹西歇
炎力挽東流水主威移董桃中壤食糟李竭股言若茲
鞠躬事則已思結渭河深恨逐秋風起輿人為悲謳伯
氏痛沒齒晉武求遺裔劉弘表居止豈獨異代人仲達
亦嗟唏

漢業自桓靈運長小人否管寧之遼東侯印田疇恥之
子亦南遊歎罷長莞爾英英豫方牧階身無百里元龍

固盛推二虎願同死片席定大謀
繼繼莫與比幡然十年心來
躊三晝禮在田欲及時輟耕
豈以已出師重於山刑國平
若水八八軒后陳三千咎繇
李大器夙既成清風流不已
前輩共心傾來者尤興起知
深鮑叔牙論定習鑿齒但言
名世生誰覺霸圖止禮樂未
應興吞魏何足唏

梅 丙戌年

江春幾夜回送色上高臺素
藥寒先動輕香暗自催迎

風飛玉遍灑雪和鹽來正憶南溪畔低枝映水開

寓有盆梅因檢林和靖詩前人以為絕調賸念故

山悵然有作

丙戌年

春風朔地見條梅夢繞家山白玉堆背面移松將竹伴
南中少雪有雲來巖泉片片流香去谿鳥枝枝踏粉回
漫道此花非隱逸西湖半畝為誰開

舊洞梅株倫所手植愴然傷悼

丙戌年

雨露沾身賦作潤風霜落子苦難栽為悲聖叟憐苗秀

亦謂荆公擬木摧樹藝十年何所託馨香三嗅有餘哀
他時獨撫盤桓處乾死酸心老茂才

又口占

歲云秋矣落其實月不淹兮忽已期祿閣有文無訂草
鍾山投老得悲詩夢長的是幽靈接心折能堪政事遺
死後猶思成子女何年買畝住清泚

四弟生日得詩三章贈且期之

丁亥年

愛子窮經久且專蘭陵心法兩俱全焚膏繼晷恒終歲

流水循環不記年曾見東吳顧文學

近惟吳下顧炎武能通十三經大義

人言北海鄭薪傳

宮坊陳介石常戲呼弟康成公

殷勤垂老來相就夜

夜篝燈說二天

六藝經秦竝失門就中周禮最崩奔墜餘文武二三策

賴得康成什一存行寡更因難讀廢道亡便以不經論

丁寧此是吾家事倬彼仙宗弈葉孫

子之近壯始昂然發憤垂帷似老泉貢舉無私知必世

弟連不得志於有司

丈夫有念靡窮年後生茂起須家法我老栖

遲望子傳今夜吟成三闕句持歸誦與子孫賢

送友人外艱歸

丁亥年

教子能名世所希況堪經史道方微幾年庭訓樞齊受
兩度

君恩插翅飛養志離憂人北闕傷心長恨草春暉九京
此日應含笑持慰博博素韞歸

六叔父至京喜而口占

丁亥年

戎馬當年海國多霞關贛嶺兩差我
一丸重趼丹心苦

卅載相看雪鬢皤，杜曲幾驚凋耆舊。
粉榆幸得久婆娑，竭來矍鑠真堪喜。
顧問重勤老伏波。

蘭

丁亥年

楚澤當年九畹滋，修森未比建溪奇。
空山行跡幽無侶，長路香風惻不知。
一出林來常味減，幾經盆種奈根移。
同心何處通言語，折與懷人贈數枝。

送四弟用京江相國原韻

丁亥年

此夕亦何夕，鴈聲驚客坐。
長連雲外直，遠點天邊破。
茲

物知天序飛止相鳴和如何一孤翻云有簡書荷成業

賴不仕

文中子吾不仕故成業

子無悲坎軻誰為脫羈羈使子寬

然卧徂徠已千株淇澳餘萬个昔人猶躊躇遲迴非我
懦臨歧興遂初末路思補過共言且分飛無令雪羽沈

疑經世用康節體

戊子年

我觀今古代治亂何多遷當其否閉時乾坤亦慘寒謂
此帝之為帝豈若是殘如曰陰陽運則帝乃無權緣此
世疑開天問發其端竭來狂馳子瞻仰詬且冤我言莫

詬休帝仁無間焉斯實陰陽為帝心良憂慙今我有一
說我說古未言人事如奕局天造如奕盤苟非極其勢
何以解其紛則知天地心無異聖與賢凶吉同憂患備
彼百苦艱事變盡更閱天能乃周全驚陸有仄坂泛流
有驚瀾不識篙師意徒然怨傾翻未喻開鑿理嗟此行
路難扶持固多術至義亦密傳道業相支拄用待大化
還譬之觀奕者局盡乃可觀元會往不返此理尚未然

讀坡公朱孝子詩

戊子年

人而無父母四海無所歸此心孰不然此事何其稀一
則久而忘不爾他而移貧賤多失養況乃際流離歷覽
孝子傳壽昌行可歎至今優伶輩能使婦孺悲摧斷孩
提日稍長走孤羈卒下烏烏羽來栖庭樹枝自古有荼
毒所傷在分飛不得存亡問安忍刻木為感入三千界
慕伸五十時百身贖覆載一念徹皇祇我讀坡仙贈似
未到精微微引區區者豈有至心祈諸姑與伯姊連類
抑何訛世間有此等須仗少陵詩

友人讀參同契

戊子年

異迹多推漢皇家亦已東修來成九百悟處得三同術
法參元秘聲詩入古桐談經諸聖後厠籍列仙中霄宇
驚籬鷄冰天限夏蟲由來龍善變自昔鳳高跼歷劫惟
金在單傳是火攻神山青未了白日去何窮疑息含元
氣噓吁滿大風冥觀禽化水坐惜鳥貪籠結志思騎鶴
馳心又送鴻羨君無退轉早晚上衡嵩

清明日周易四勿詩

戊子年

泰陂豐旻勿恤勿憂喪弟喪貝勿逐勿求无妄之疾勿藥則瘳損己益人勿問其酬我觀古人志務自修禍福不計何況恩仇今人之心利害橫流圖度天命廣設人謀有者欲聚去者欲收殺人除患責報無休槩以天道奚止贅疣因風益火畏溺自投若慮陰雨無過綢繆欲禦寒冬無過添裘朝暾皎皎浮霧不留洩雲濟物還雨崇丘凡百君子玩易於周補過无咎心逸日優

賦得孟夏草木長和諸子厲志之作限韻

戊子年

四月初維夏松茂薇亦剛欣欣齊天澤田野又已蒼農
夫勤服穡汗下職所當躑躑媚學徒念此惻中腸彼不
昏作勞歲暮將何嘗而我倦道藝老大無乃傷人生
中歲後譬如度秋陽南晷日以速西風日以猖斯時興言
邁景促道路長及此曜初曦庭院積餘涼對時懷壯厲
鍵戶探幽藏逸興縱橫飛今古在一堂鬼神將來會千
秋惠我光唐風有遺詩其無以太康管子戒懷安齊姜
淑謀桑聖賢不勤止一念亦作狂所以騷人悲撫壯棄

芬芳

端午詠懷用老杜韻

戊子年

廿載長為客天涯一病人東山虛雨屐南澗逗烟綸蓄
縮平生志蹉跎海嶠臣流年多感慨弔古坐酸辛此日
天中節微雲塞上屯羲和初正夏

書以正仲夏

日月始交秦

五月辰在鶉首秦分也

一片三湘浪千秋二女神興哀招滯魄擊

鼓動潛鱗遺事荆巫遠悲歌郢雪春誰憐荒國舊但覺
歲華新紛我南陬士朝天北闕頻幾經梅雨染長訝帝

京塵鼎寶慚無素書空擬與親徒餘忠作屏幸有德為鄰屢省幽蘭佩憑垂戶艾緡重華今在運何處整冠巾

又口占

風雨多佳節端陽忽似秋綴窻猶剪紙趨直正重裘垂

老耽無味閒編贈百憂靜中先子句寒暑任遷流

寒暑非可

意定故隨時為靜中功夫此先人四十年前夢中語

題楊氏園

戊子年

清神瘦骨舊黃堂累石行泉注曲塘獨手栽花兼插柳

誰家載酒去尋揚
閒辰寸晷真難得
薄暮浮雲又散將
極喜此翁無世法
懽然顛倒忘衣裳

七夕限韻賦詩次日直中閒坐因鄉賓期屆悠然

有懷復用前韻兼勗諸子

戊子年

帝門方廣闊
天牖當如攜
將雨動山川
水上無高低
賢聖有側陋
君子固卑棲
獨行道則爾
爭先術匪迷
馬骨九方歎
羊皮百里奚
日照無光處
風動不言蹊
中人固脂韋
雄者尚滑稽
碧霄尋枉逕
暮夜躡高梯
一雉豈譽

命十禽自矜嘶時雨忙春草長河驚渴驪惟有蘭菊心
嘿嘿馥空齋修身原不援知命更誰擠食野相呼去遷
喬自在啼廟堂佇舟楫四海望雲霓愛國精心待思賢
極目睇道隆應有象氣感自然齊昨者初秋節敲詩至
平西不堪陪坐勸即事起新題

長城懷古和友人

戊子年

列垣竟遼洮屹為中原衛昂畢限華夷招搖轉面冀未
封關將丸常爭野人塊古昔事羈縻隄防遏其潰誰為

萬世謀間巷自破碎至今壓連峯徒有灰石在後來踵
迹者臨邊亦已再思古拊髀嗟懲後刺心悔德義信干
城尊卑殊外內跳躑天所驕瀆亂神斯廢豈知有道時
干戈長戢載威武極露寒聲名窮日戴塢侯鈴柝稀猛
將單車代繫頸組空煩稽顙印競佩即見受降城延連
起耕耒堙塹歌未休興亡千百態三駕域中清一怒天
下對瀚海即溝渠趙代安足塞

題關侯像

青縹多義烈公聲自悠緬域外欽英風何論禹所甸聿
當草昧時歸依識繫奠相事王霸圖力疲龍虎戰餘焰
誰共吹南陽一巾扇擘畫規宛洛隱以上將薦故委吳
魏衝俾公當一面渡河計已窮浮江事中變敗盟楚甲
起監國殷人畔怒浪排三湘悲風彌漢沔昔在保陽初
闕亭伸藻獻夢公與武侯再拜容相見想像季路勇仿
佛覩纓弁代匱縈霄多精靈每迭現豈況五十年災屯
護持遍以茲念神感齋心奉繪絢朔望整冠裾晨夕禱

私願公其啓我衷補過消罪譴

聞家駒多舉者喜而有作且留勉厲

戊子年

八月中秋夢或餉四鹿來果然閩書至羣從與計偕吾宗自明始經營祖德開於今正八世陳仲卜方諧諸子何為者

君恩祖澤哉懸知爾父母顏充髮變皚親鄰羊酒賀告墓闢荒萊羈宦忽聞此驚懼腸幾迴酩酊離披候酒力花容衰所以古人心惕惕念栽培我今蒙積厚無功逼

三能每憶先人苦宵終明發懷祿既不逮養志行日以
頽蓼莪我蒿感白華華黍哀休祐德所承福基禍之胎
集木未足喻深淵倚磴苔諸子亦念此無為天棄材謙
使六位吉孝能百行該淳年閱人事榮落風葉催子今
如不畏天命安可回歲莫屬當聚為爾酌深壘侑以宛
鳩詩覲曉鳴和喈

題吳禮科行樂圖

戊子年

我猶及見公朝立一時器觀盛容威揣摩利弊善諫草

同官從丐膾膏肥閩中舉子數百輩已入文吏四面圍
公朝抗疏

陛下聖綽開羅網各飛飛逆藩債帥專嵯政家家淡食
痺而靡誰能觸燄陳民苦此事猶得鄉評歸亂起坐知
公不免公已前期與世違吾鄉俗化輕先達公之功德
獨嗟唏況我附葭兼忝識獎我寸長匡我非即今逢人
多假借益念古老無脂韋撫公大節示後嗣長康小卷
為公揮

韓文公已丑年

吾觀近代士於古務相逾誦讀兼草草指摘又已疎有
如唐韓公鄙為詞章儒傲若齊晉大卑視滕與邾昔人
亦有言湖海非雙鳬適此儒先後孰不撫其餘況乃瘠
咀淺未能去皮膚奈何坐自貴動擬昆侖渠韓公生是
時胡不一攷諸玄元國之祖西方代所趨奮然竝斥逐
怵心人鬼無揚雄似孔子宋世猶陳鋪截取自孟氏無
見乃云乎六朝淫靡甚樸學不能驅公與極其藝然後

識典謨謂公流溺者亦匪公之瘡尊周如其仁距墨聖者徒法施於吾人索垢曷區區親見貌位者不怪舊唐書張籍但知文漫以大賢呼李翱庶高第開首論楊朱

農民苦行

己丑年

四民最苦是農家食無兼設衣無華遇歉已傷熟亦病坐視大賈居贏邪不受公廩佃富室場登早已來分瓜天行十八無盈數私租豈肯毫釐差朝廷時有蠲優詔農錢多不上官衙或逢繇役富者免追胥仍向農家槓

初春指畝貸升斗桀強收息數倍賒年豐未足填責負
此離荒歲又何嗟衝炎冒雨敢辭避但恐乾溢及桑麻
粒食之艱自古志豳風綴景正而葩前代賢君識此意
治效輒得史臣誇

聖朝寬恤無虛載訓辭深厚漢文加歎息作甘人長苦
殷勤示儉國無奢欲使大官知穀貴不矜元老歸禾嘉
周書無逸陳座右憂思鰥寡至日斜噫嘻農業為國本
聖祚應與姬歷遐

賦得閒字常自閒沉心何用寫

已丑年

昔尋舊壑去偶爾為時舍居然謂真逸朝暮雲峯下翻
笑浣溪花不是知音者長疑勸駕多何因招隱寡未上
五湖舟果秣萬里馬別洞屢移文羈棲成久假豈少近
郊垌無心出遊寫荏苒龍鍾來躑躅麋性野鴛足金鞍
施枯枿湛露灑閒閣非闕病省愆動盈把

賦得孟夏草木長遠屋樹扶疎限韻

已丑年

廿載燕師邇

帝居西山遙影擁琴書青郊露重枝先拂綠畔烟消草
未鋤長日惟能吁暑暘流年徒自省空虛汗濛不是無
佳蔭素食優游愧有餘

喜仲弟至作又賡之三首

己丑年

江漢喧卑難久留一行作吏豈能由雖無最課膺徵拜
幸免辜功入例收回首不貪魚穴美翻飛恰值塞鴻秋
家駒在側猶堪慰小宛繁音續未休

廿年紫禁此淹留始信行藏不自由卻羨埃塵三載後

便將江漢一身收
新詩舊卷抽風晚
雜竹閒花砌露秋
拚得榕村權鎖閉
連牀未覺雨聲休

成雲洞裏白雲留
幾度移文蓋有由
木落山空須一掃
梅肥笋嫩未曾收
離魂渺渺終成夢
寒露濃濃又洗秋
但得君恩紓倦鳥
行行余季亦來休

和王姚江火秀宮示諸生原韻二首

己丑年

平旦陟高岡
高岡日又晚上頂
本是真人居
欲趁光陰路
彌遠左右屬
迹蒼苔斑多少
先登人非緩
余髮方未

燥即慕夷曲與天泉夷曲幽幽九折坂天泉半灑雲外
天泉洞老仙語朗朗總欺人原當胎氣未完足雷霆發
亂來驚春丹成淡泊守規矩瞥見狎鬣誇龍鱗我與往
還四十歲回望故山新又新竈火如銀一片白案上徒
有明牕塵殊無許多單傳訣坐知光景萬非真自從東
京入佛後例倚正議助怪神先生便是廣成子安在別
人都已死橫將生死作分疏打斷虛空無乃此

宣聖當年尚假年儒衣千載此真傳萬形不是周遮遍

太極如何恁地圓只可占將後死者休來突過古人前
操戈同室堪嗟嘆恨不當身與講筵

中秋催月

己丑年

微出潮頭影已新閒庭延望早通神一年佳賞長如許
此夜清光別有真蕭颯雨餘堪濯魄朦朧雲際便翻身
桂花欲伴黃花發寄語幽宮淨掃塵

蔡聞之尊人雙壽

己丑年

南浦扶輿浸海波風流近代發黃河

明季黃石齋何元子兩先生俱漳浦

人龜山舊得中洲派

河南中丞張公講道吾闈翁從之遊


湖府新增太學

科

翁為羅源教授張公延八省會書院俾作師長

更喜熊丸知母教即今鳳羽

已天摩雙星齊向陽春曜朋酒賓筵喜氣多



榕村集卷三十五

欽定四庫全書

集部

榕村集卷三十六

詳校官侍讀學士

臣法式善

助教

臣

常循覆勘

總校官知縣

臣

繆

琪

校對官學正

臣

翁樹棠

謄錄監生

臣

鄒世俊

欽定四庫全書

榕村集卷三十六

大學士李光地撰

詩二

翰林陶某尊人七十壽辰道遠未能歸迎致京師
用伸陟慕二月初吉同人畢集舉觴余亦詩以賀
之翁於今未謝應舉也

庚寅年

寒白家聲歲晚收西江靖節舊風流學弓今已通金馬

埋劍還能上斗牛
畫錦循陔羈北闕
春花扶板耀皇州
知翁用世心猶健
此日賓筵即壯遊

二月七日仲弟生辰詩以祝之

庚寅年

回憶髫童纔如昨
相看鬢髮已成蒼
庭羅五子書收拾
腹有三壬祿主張
二月吉初春雨霽
上垣景滿夜光長
髦期潦倒吾諸父
暘日飛鳴繞舊梁

題汪千陂黃山採藥圖

庚寅年

茲山源流遠岷峨
發崔巍峽雨通荆
樹江風入嶺梅

山脈

自梅嶺
而來

迤邐兩都會

又發脈
生江浙

佳氣亦悠哉
旁魄非凡境

草木得未栽
吾友汪君子
告我採藥來
勾吳異代事
彼值殷商衰
吾子生

聖世何病獨徘徊
回首上章歲
春風塢鴈哀
同稠十九人
取次已塵埃
望子大先業
好勇宜取裁
武夷與黃山
仙霞為之媒
中有聖神迹
夢寐日幾迴
所願如吾子
至今未得諧
安知不如意
子志亦行灰
壯子出氛意
欲勸又停盃
語默果由人
訪我閩山隈

王孝子詩

并序
庚寅年

有明中葉霸州文安縣孝子王原者父以貧苦避徭役逃家去遂久不復返去時孝子在抱稍長問母始知之慟哭求出門迹父所在母未許也既受室即堅辭毋行徒步數萬里歷十餘年乞食為糧遇神則叩額哀禱至於感異夢逢異人卒得父於僧寺中如所占兆遂奉父還家力耕以養父子皆眉壽迄乎曾孫榮貴至今不絕前輩多傳其事者余覽而悲之為代

孝子詩十數章以綴本末又系之以歌寓一唱三歎之指焉夫南陔白華華黍有音無辭然序者以為皆孝子之詩也余意必周之盛時俗化醇茂有至行著聞而不以文見者無蓼莪杞岵之什以抒其哀而後之人為之譜其憂思奏之絃管厚王化之本彰人倫之勸蓋余今者之作亦東哲補亡之義而長歌之篇則眉山蘇公所以累歎於壽昌也

一

哀哀生不辰幼小失嚴父嚴父去何之為憂猛於虎

二

七歲識人事慈母告我知使我痛欲絕慘裂中腸悲

三

無父吾何怙從父母誰養抑哀度日月不覺年華長

四

弱息可陪姑孤子當求父亦有倚門悲傷心去不顧

五

生當與父返死當傍魂飛宇宙雖茫茫幽明必有歸

六

侵尋遂多年趼足走萬里日食仰朝烟夜宿荒山陬

七

逢神即有禱遇人但告哀東入田橫島白浪兀崔嵬

八

清晨感異夢覺來向人說老者顧憐余從頭為分別

九

莎根本附子和之苦後甘應有會合喜行行且嚮南

十

辛苦至中州寄食夢覺寺僧出文安人為叙同井誼

十一

相問姓名間父子驚悲倒兒貌父不記小字猶分曉

十二

父言已絕念無面返鄉村牽衣投地哭哀感動沙門

十三

誰言僧無父殷勤為我勸幡然發回心感彼大悲願

十四

抵里叩荆扉慈母幸猶強驚子來無死且得父相將

十五

喜極哭復昏閭里亦橫泗聞說古來人果然有此事

十六

但願大椿茂歲歲護花開力耕吾能養不望檄書來

右代王孝子詩十六章

文安孝子二百年奕葉之孫宦中翰昨夜聞言歎且啼
今朝得閱前人傳父子誠然是性生亦緣慈愛日相見
世間孩幼失怙恃忘情絕憶更無算孝子心傷無根草
鮮民之生死所願尋訪一去十年賒周游何止天下半
自古完名乞與人必令諸苦皆填遍天公憐無退轉心
指點路途出夢幻在昔明初高皇時給諫侯公救父難
彼父在謫身可蹤難者生死無音唁中葉風厲道寢衰
莫將行誼當朝薦事君不求孝子門使捕魚蝦老葭蘼

獨有神明感至德孫枝茂行科名存我曩承乏撫邦畿
往來洄溯文安淀鞅掌未暇聽風謡愧不表彰誠覲面
雖無文采動法宮長歌庶作薄夫勸

右贈王孝子歌

壽高翁不危九十翁有弟特騁棄家遠去

庚寅年

綺里采芝逝東陵但種瓜高風同百代語默道未差徐
淮俗化異竒俠隱音華笑談海客去然諾楚人誇世出
世間事二難并一家千秋高士傳雪映黃河沙即今九

十毫綜理及魚蝦心知地行僊翻嫌舉者遐令威如一
返應識吾道賒

仲父破賊拔家難於今五十餘年矣欲為家傳
紀其事而未成偶因為文安孝子詩愾然念先
世舊德屬韻述其梗概且寄家後六叔父及弟

姪輩

庚寅年

我歲十四五乙未丙申年山海正搖蕩四郊盈氛烟避
地高山頂巨寇掩其巔舉家悉纍去季父亦在焉父雖

脫身走骨立形僅全吾祖以憂隕遺恨子孫還伯父時
遠出更有官事連驚聞家喪亂犇回哭柩前與父握手
泣何以救髣髴我效東海人輕身赴其艱妻兒牽不顧
直入虎狼樊慷慨陳詞義賊帥歔歔歎備禮送之歸月
骨終未完至心忘恐怖危事轉機關此寇樹本固擇居
巖輿間三窟安永德四出延漳泉分收要地路高据挿
天巒官軍屢失利為徒實有繁自從鼎革來至是已星
環伯氏召家僕益之傭與佃涕泣以情告甘心願喪元

乘夜劫其巢巢嶮雨又漫百人造峯下廿八為登先霧
重晨昏晦泥深澁且顛既知入死地大呼撼賊盤睡夢
賊驚起不能辨衆單踉蹌填崖谷妻孥全棄捐余季來
無死季父得先奪出諸孤繫猶孿尚有七八口被羈在他山賊
氣憤怒甚逐日戰聲喧余時險難中見之魂魄寒兵敗
便榜撻刀刃頭上旋且戰且議贖又許歸其媛賊云我
無家不足相準權無那害氣究勅寇一朝孱萬夫當百
卒有似卵投拳嘗以十九人父伯同孤塹千賊凌曉至

勢無復生存仆旗殺其將十里窮追犇此事尤奇異鄉人到今傳孟夏迄初秋小大鬪百番係囚盡拔出兇讎一時前伯父士之彥聲藉弟子員每入文場會芝草擢枯管奮起為急難衝髮上儒冠文武聞天下諸公蹟有

言

學使者孔文在公與僚友書云李葆甫文事武備見於天下

哀戚患難中為詩廢

午餐癯然深墨色銷盡渥丹顏一家隸也力三縣壘無堅良有神道庇豈非誠所專當道斂衽推功成絕因緣竭來遊太學遂去邇家園別駕拂衣謝巾車下澤間書

史湛日夜餘事寄絲弦我祖當明初

八世祖立功天順朝

好義聞

海堧曾從平江伯軍功得授官小子方家居適值閩沸
然亦以濟王師黃閣驟起遷伯也誠高蹈時論何忽然
奇節未章表懷之心惓惓昨者撫京畿奏事

乾清門乘間陳始末從容蒙下詢在原嘉昔日于野遂
聞天巨榜揮

宸翰深恩賁九原命遣偏裨送鄉衆萬聚觀國編未敢
望家乘庶華爛沈思孝友後必有本支賢我今如不述

蹟久事將湮沉懼流風微末遠忘根源薄物多詬誶觸
眼互睂睂儻憶前人厚足令鄙夫寬他日詳紀載為詩
發其端

世祖賜栢鄉座主雪江獨釣圖恭題

庚寅年

側聞長老說

先皇館閣臣寮如家常政職之外通譙笑有時揮灑翰
墨香吾師丐得當軒蹟子孫奉之寶金網

先皇明示絲綸寄又欲臨淵振天綱果是兩朝為舟楫

功成譚笑入滄浪莫言五相一漁翁宰相漁翁一槩量
鍵戶著書五百卷應與渭水論行藏
盛世君臣饒勝事尺幅烟波有耿光

讀漢留侯唐鄴侯傳

有序
庚寅年

留侯鄴侯出處語默大致相似然自漢史則以鬼物
為疑唐舊書遂用詬厲余觀二子固非董葛大醇者
比然所遇亦各不同方外之託殆古人隱曲深心未
可据迹議也

羸焰烈已極不獨報韓私碣石狂風來九域正離披二
子誠逸民豈忍坐視之雲龍三古後安必虞夏期相印
輕於銖侯封比丸泥攘袂扼腕處即有善刀機呼噏存
亡間卻似閒點棋坐呼采芝叟緩誦種瓜詩幾回思塞
兌再出整重離此是賢人心神仙固詭辭自從崆峒來
下迄華山希身授帝者法不為帝者羈是或一道爾於
義不相疵我論兩先生如惠復如夷史遷好奇偉畫工
只毛皮唐人亦貌取珊珊骨所啗何況東方者立德不

純師

喜孟秋月有閏

庚寅年

不愛春光豔，惟貪秋景頻。霜華多既物，月色倍還人。場

圃寬收拾，枿楊慢設陳。

每年以孟秋奏獻

西成應再熟。

京畿各道秋禾

甚茂 巽命恰重中。

是歲停刑

魄滿增他夜，宵中正兩辰。山花迷

歷日黃菊破枝新。

送張景峰司寇歸韓城

庚寅年

鎖院謁沈沈，偕公事檢校。羣英發春暉，孤潔懸秋曜。閒

夢到幽蹊千花向我笑中有十丈紅知公為領袂病夫
何碌碌承風采餘俏旋膺北斗司共奉明離詔職掌同
犇波西園一股頻如何便歸飛告我家山妙淇澳萬蕭
森嶧陽兩修峭洵許樂丘林無競報廊廟司敗一片心
東皇萬里照惟有青門人含情酒不醺早晚踰梁山陰
陽遲爾調

讀明季魏孝子學泚贈鹿太公百韻詩摘四十

韻

庚寅年

明衰當晚造時事沸於湯亂象成郊野深根起廟廊蠅
營淪白黑龍戰混元黃占得守宮兆星搖宦者芒晉君
迷二豎秦國棄三良處士推東漢清流湛末唐祖宗優
積累節義滾成行慘裂聞周魏彫殘繼左楊卽家誅宿
舊提逮出軍廂孝子紛營護忠臣自慨慷緹縈誠可憫
張儉豈曾藏烈烈名家子哀哀岐路傍上書嗟聽遠避
迹畏聲揚投命明知德抽肝發頌章閒情皆懇款苦調
反鏗鏘猶切完巢望終罹滅性殃詩辭盈百韻才藻歎

兼長宜作時之瑞如何遇不祥瓊英灰烈焰碧蕙殄秋
灤漫說身無就吾云行已芳不亡是聃壽何處論彭殤
鹿氏傳忠孝燕臺擅族望直辭批袞闕偉績佐巖疆子
也遑將父翁言但死王太公故韋素義問滿衣裳交盡
南州彥亭齊北海香奉常怡暮景閣老事高陽雨化江
村席風移易水鄉承顏仲稚慕蒿目激中腸他日孤城
碎空身白刃當賢郎哀毀甚魏子後先相始悟茲亭闢
無心海內颺平生多與許變故忍忘將直為憂同病非

因救有喪草枯憐臭味狐死痛悲傷任俠寧堪擬求仁
庶可方山戎表孤竹昌國剩汶篁臣子垂千祀幽燕有
耿光斯人良繼躅況我舊乘障感彼蓼莪什賡歌為變
商

中秋喜月

庚寅年

昔年拊王甸所蘄風雨和每逢節序日瑣屑問謠歌三
五殷秋仲來歲占麥禾往往深夜望白露濕衣多責重
信神理不謂民言訛今夕復中秋孤曜奪星河游絲渾

不掛綠淨一天波是日巽音下恩施沸滂沱海郡直乾
卦千家槁上科轉米三十萬帥府為聯牂茲事漢來無
禹稷或經過喜氣排新霜豈為枌榆頗即見三登治吾
老卧丘阿

李巨來母吳氏六十

庚寅年

草廬舊望在江州婕妤曹家世業修永夜燈光兼紡讀
由來壺教即箕裘斑衣線迹春暉滿彩軸綸音歲晚收
好把護花高樹背明年甲子又從頭

擬古詩十九首

庚寅年

蘇子卿懷李陵

熒熒陌上花經霜著根蒂人生義與恩蠻貊不可棄蓬
轉入邊沙所分長委翳回飈忽天來吹我上雲際故友
盈觴酒殷勤為我置短舞復哀歌淚下霑襟袂嗟子慕
奇勲終怵神明忌自非上聖人達節安得冀

武侯躬耕言志

我生逢離亂避世來南州四體聊且勤正為衣食謀中

原戎馬暗微管何時休
天王狩洛許厥咎在諸侯
耕夫亦何冀場功歲晚收
稂莠紛不薈誰謂我無憂

又續梁父吟

我昔瑯琊日行吟
悲晏子今此輟耕來
居然寄百里歲歲欲東征
苦無精銳士先生相齊國
一日遂忍此晉楚方疆大
時欲疆我鄙民感區豆恩
爭為陳常死公室正睽孤
漫言以禮已

陶靖節懷古

五世生韓家秩比趙魏老一朝西風動武穆枝葉掃

邢

應韓武

之穆也張子亦何歸避迹甘枯槁不待擁立時預識商

山皓偶乘少年氣平沙奮一搗意外逢真人因緣攄素抱時會非邂逅辟穀良須早

張曲江歸韶州

海嶠搏飛來科名慙我設

曲江中道
作伊呂科

既乏匡時資寧敢

忘歸潔皇路雖清夷吾道每弭節黨人樂已媮衆女曼相說鄙夫抱狷介生還固無缺翻思忤王鳳又曾識石

羯余身豈憚殃誠懼駭機發贈汝繞朝鞭恃有祖宗烈
杜工部居夔

文翁既已去相如病奈何溯游夔子國坐望巫山阿襄
王名跡早先主顧命多古編增感慨近事日蹉跎蜀嶂
有洩雲蜀江能興波飄零乃如此卒歲但浩歌

又聞郭令公退回鵲

我有八哀詩昔為寵亡族郭公方朝宁未敢入題目曩
者二京淪收功兩年速掉臂行艱危無心避螫毒顛沛

義益明晚節誠尤篤片言拜花醵杯酒卧廬幄宗袞伏
忠信王路濟傾覆名配尚父尊兆叶大人卜庶幾叙西
戎從此靖荒服詩史病江干無才頌方叔

韓司馬從軍

宣王既平淮桓公亦侵蔡苟非以兵車到今民何賴列
朝姑息恩達官老成態書生憤欲絕儒纓擬將壞但令
渠魁殲不望通侯拜

又撫山東過華山

我昔登華巔慟哭憂墜死今來諭強藩日行四百里引
分有重輕非我前怯耳孝子不登高臨陣無退靡

柳子厚與劉禹錫論詩

退之文最奇往往似周漢能為揚雄掬卻效孟軻串詩
亦大破時自言格一變天秀綴枝柯所遺放直幹古人
不相師終然存體段

又東韓退之

少小不自量失身誠有之雖然愆過重終與仁義期夷

吾從子糾仲由比季斯亦云行吾誼遂貽君子嗤魑魅
為人禦鬼神諒我知願言出三物釋此同道疑

种明逸見希夷

我志薄時尚簪組非所求遯迹華山下養親具薪羞側
聞山間人綺季乃其儔聖祖混中原抗不事王侯乾坤
理一貫水火道雙修長夢周海嶽回來飲寒流顧視五
代亂升沈擬蜉游真龍既受命一笑萬事休松風正屑
屑山路轉悠悠雖無雲霞姿結願在滄州

范文正登第後

韓子齏鹽飯我乃親嘗之讀書得一第穆然更憂思
承五代敝馮道老韋脂士習今未振致主當何時翩翩
鴻漸羽所貴樹之儀絳灌雖重厚坐使賈生悲

王荊公與曾子固論文

歐公文之彥懇欵自紆徐近出縱橫家源流取張蘇懸
知百年後靡然皆步趨尚存古人體惟我與爾夫韓柳
未足為何況漱其餘晶哉曾夫子共味六經腴

又鍾山書懷

夙有家食尚中路聖明偶俄然忘薄劣欲以瓦納牖宣
尼衰無夢姬公去我久儒生何不量虛己良已厚狂瀾
方滔滔豈易挽之走但知霜雪嚴誰待陽春後望誠負
蒼生怨乃及朋友投迹鍾山下日夜訟愆咎雅衰四裔
侵俗敝人鮮飽器窳蠹莫知瓶存絅已朽民訖是多盤
孰言革三就我憶白露詩願將周禮救同禍不我察棄
我如敝帚鑠盡固是金所哀樹百晦寄語爾新昏無易

發吾筭

蘇長公贈劉器之

退之在潮陽不覺大顛下云能外形骸衣服為之卸況
我同道人意氣相凌駕及此共遷流鐵石乃君亞海外
乏友生傾心向日夜謂我浮華芟無亦虛假借

朱奉使還朝

燕山十六年不料復生回悠悠涉淮泗西郊已漸開休
兵雖可喜誰言兩莫猜憶在彼中時賓禮數日陪密問

何音耗新自順昌來仇讐不足雪蠹種安在哉不望麒麟閣願參御史臺歷歷述所見仁聖豈無哀深恐和戎人未是魏子才歸心何鬱紆歸步正徘徊

岳倦翁謝改國史

先臣誠好勇殉國昧知幾匡復親承詔精忠獨建旂雖張難與竝自檜更何譏異慘當朝泣深冤列聖唏九原紆勃鬱五嶺返羈轡日歷湔虛影春秋炳白暉名存身不死功隳節還巍梵子安能報中興仰帝畿

真西山謁建陽祠

生于夫子鄉髫齡未負篋幸此崑崙渠爛熳山溪決孟
氏計所生相望猶幾葉今我拜幽宮高第響然接既茹
瓊玉英花露豈足獵同里兩文公

楊億亦謚文公浦城人

吾將安

卒業

春日西郊泛舟

辛卯年

田生非田家諸父皆嗜儒買舟具艤核邀我泛清渠茲
塗日所經車馬但喘吁風埃洛城外何曾省鑑湖是日

天濃黝餘寒頗蕭疎愛似南溪水晶瑩照髮膚含恩魚

在藻

捕魚有禁

應候柳依蒲太液通西岫深溝寫平蕪扁舟

思夷曲錦纜憶姑蘇尋花升遠岸行樂到浮圖諸子雜

逸興老者忘病軀及辰修禊事

翼日怡為清明之已

歸路滿風雪

薄晚風勁

連年看夏芍春朝此遊孤長望山之阿所思天一

隅信美非泉壑聊樂出闌都主人善醉客懽言日未晡

怡園雅集排字

辛卯年

晨起嘗衙餐折柬謝文翰徂歲易新姿東風破舊院朝

岑景已迷夕峯根未斷午氣納寒輕疲身獲歇偏繁陰
谿香開茂密鳥啼亂句律欣共搜心迹憐全判德音抵
蘭芬低回極歡翫

送唐次衣歸省

壬辰年

綠浪漾麥華之子循陔去白頭望斑衣應倚庭前樹巧
匠忽袖手遣誰實館署俗下但犇波豈憶南山霧此行
盛所業來只光文部況是古人心不以三公顧柳雨湖
邊舟花風壩上路無窮惜別意轉作羈人慕投老負

君親素食已孤露慰薦賴友朋栖遲付良晤愁人兮奈
何風萍礙離聚邀恩抵故丘去來幸一遇事業富後生
鼎鼎方未暮振刷步清夷甘使流年誤吾歸山之阿寓
我以佳句

壽梅定九先生八十

壬辰年

去聖三千遠六藝日以湮專家多墜緒絕學少傳人往
往振奇者紛論失道真坐令殘陋輩嗤斥謬云云我識
梅先生倏逾二十春始見浩然博繼飲薰然醇扣其生

平書累世莫問津秉鉞在邦畿館置城之闥後生頗知
問我老又誰陳獨念千秋業名山猶可分誰能師老聃
存之俟子雲金薤一毫芒梨棗已繽紛寶氣驚星斗天
上動

至尊連日乘仙槎輝光薄

紫宸授官臣已老賜榜顏其門別來又七載音素常諄
諄蠅頭滿長幅龍馬想精神堯夫室一堵欲學范希文
衣冠鮮此志無力故足珍借問今何其丹書出渭濱道

術混默語古節高賤貧有孫能傳業文質已彬彬況是
連床話歲歲雨風辰當朝盛制作官曲一齊論吾知先
生壽有如川方臻上之偕五更饋醕為國賓就其老巖
藪戶外屨亦芑惟恨千里隔無因奉酒樽春風九十度
祝哽及茲晨姑蘇佳麗地杖屨每逡巡頗訂明年諾相
遇菊花新

題成綱齋所居畫圖

壬辰年

城南有風榭煩暑每來洗草樹暗生秋蒹葭明寒泚靜

者厭卑喧蓬居乃鄰此繪事寫幽襟歌篇動逸耳子佩
十年初鄉賓他日始名獲渾無心學荒矻有恥悠然思
溯洄何人秉周禮

題高氏望親廬

壬辰年

子房負奇氣此地遇石公君親事既畢然後從赤松高
士諸生雋幼慕出樊籠顧瞻乏嗣息嚴君壽未終適館
授荒餐卧不設苴茸云有萬里游欲令狎瀧凍夜視蟲
如車拔髮串蟣蟲親代婦已產一暮若騰空孝子哀求

索歲行又闕逢君留有誓言吾去不可蹤其兄今大耄
儒俠淮泗東君理猶應存遨嬉八紘中以茲孝子思為
作望親宮屬我紀其事高揭碑之豐我本塵土士素論
薄崆峒嘉君無弱節足以厲悲風天上有神仙不離孝
與忠聞者休詫驚為爾話參同

劉西谷館丈宿負詩名罷官乃益攻苦遂造古
人妙處方期鼓吹大雅奄疾不淑同道歎傷余
久瘍病喪不親唁追作挽詩寓為盛世惜才之

意
壬辰年

焚焚植春卉幾人獲其畚非啓山川閔終當塵霧遮劉
子雍州雋早乘鳳池槎秦風古悍勁濟之以柔嘉名聲
久藉藉而我日星車未能發篋笥已向傍人誇會建行
臺節來觀析木嶸迎我西沽東水澱漾日花職事讐何
遽文章厲益加何殊永柳者芝菌擢寒葩近日數王陳
館閣闢詩衙君材尤茂出清泚露文砂二公相繼老代
置有絲麻

聖世誰潤色朝著佇朝報歲內隕三星茲行豈龍蛇風
騷齊委翳人物發深嗟孤旌幽都暮荒車嶠嶺斜玉樓
知何處詞會失專家北地才難久西鄰文喪耶不鄙謂
余老披心共酒茶百韻篇在手寶之瓊瑤華君沒我方
病大招無挽些書此寄吹簫白露正萋葭

寄六叔父

有序
壬辰年

六叔父七十壽辰擬為詩文以祝職鞅鹿鹿三年而
未就今朝援筆聊爾成章仍是敘述艱難非祝釐體

也雖然言於尊親者無文而叔父至性奇節所以取
勲名延福壽在吾宗則宜有後於魯者其大致曷以
加茲既用奉寄又將廣徵能言者詞韻彙成冊頁俟
他日納致尊前貽示子孫有孝友天植者尚得以論
其世也

叔父少奇叔善悟不耽書稍長從所好高下遂烏魚適
值閩中亂奴隸亦節符叔以俊傑名儕輩盡招呼吾叔
莞然笑云我病在軀坐視羣兒戲三歲集于枯我時一

丸蠟無路至幽都上懼驚長老下畏洩童雛向叔咨度
之答言忠必輸汝迹不應露吾艱敢避乎再遣未能達
身送我僕痛夜走連城險直上贛關孤拜表西江介取
道鄱陽湖歸來成血牋半載卧呻吟王旅既南下及我
共憂虞排浪扼鯨蛟依山搏虎羆團鄉勞子泰哭庭劇
申胥中丞阻白鴿將軍滯石珠支橋通鳥道枕席過師
徒代我控辭章遂上機密疏元凱權為將班超便棄儒
西邵東渡海專閩衡山隅雅歌長游詠輕裘獨曳婁非

久丐身去不與註誤俱忠智哉吾叔章逢孰有逾收蹤
從松石浪迹恣粉榆書畫已工絕晚更事鉛朱經義數
十篇風格變唐瞿以茲課孫子騰達有三姝幼學尚多
輩飛鳴竚後圖前歲吾面

聖顧問尚憶初人生終始節完全世所無少小同災患
相將兩素鬚白楊傷滿望寒柏只孤株魂夢歸杖几嬉
遊逐巷衢瞻依應有日預此寄區區

壽蔣子遵母五十

壬辰年

吾友何屹瞻設教姑蘇城其徒八九輩盡為天下英或
能熟紀載或能妙唱賡晚更撥其華驅之以窮經柳州
有家法韓門互自名擁比渾無迹曳笏何須驚就中制
藝者直蹂王錢庭曰金又曰蔣舉德妙義生古人亦今
爾何以學易成外則功師長內則恩父兄蔣生有賢父
厚教薄經營既知所日嚴因識誰寧馨孰言芝無根醴
水源自清板輿他日事即此為親榮今朝北堂舞下奏
南陔笙百歲茲方半正似月垣平我歌致所望不復作

聲鏗

題汪荇洲館丈把犁圖

壬辰年

贊飈魯齋賢昔有王磐者便章政事堂躬耕懷孟野此
是一絡事如何知者寡遮莫夏畦荒塵埃紫陌馬嗚呼
乘馬騎牛會有時君今此志尚愆期阿昆暘日采藥去
黃山移文未許歸白髮青叢春雨外一幅長康為我揮

夜坐不眠念修宗禮述志

壬辰年

我先君子天常性生篤厚源本推溯宗祊衰俗之中心

焉禮經我祖之終其目猶視祝之不靈先君乃誓立
廟修墳怡然而閉兵燹之後祠燬墳荒所以我祖念
之不忘先君誓止永言皇皇皇皇多年其志乃就頽
址楠新堙丘松茂割田立守蒸嘗是侑乙巳元日聚
族於斯肇行一獻咨度禮儀于今四紀姓戚循之宗
子法廢愛羊存朔直年均勞奠獻以爵三人居中跪聞
嘏祝為此禮者非曰貴貴載稽古義無祿不祭左宗
右直以昭穆位

余家主祭一人有爵者中立左宗子右
直年蓋有爵則得以其祿祭宗子以存

古直年以均勞也其序立則以昭穆尊卑為前卻若宗子貴而又直年則主祭只用一位

大宗之

祭長至春元始祖先祖論取伊川尚有春秋沿舊以禋

有明時宗中先達率於大宗祠祭春秋先君增以長至元旦實與伊川論合然春秋如舊有其舉之未敢廢也

此外小宗各遵其格法得立廟自厚於昵五世則遷

自統於嫡

今達官封贈及高曾則法得立四親之廟然五世之中須以達者之宗子宗孫主祭雖旁

支又有貴顯自復立廟為宗則可不得於小宗廟主祭蓋先者之澤未斬也與大宗之禮不同

大體

既具細文未修凡我後人置此悠悠鞫宦於外有軫心

憂 濫廁清班宜禮而退服古於家庶啓來裔鄉鄰慕

者兼此講肄 祭禮之外謹始慎終冠昏喪紀弔問吉凶有殷無替民德斯隆 文省情多費薄意厚雖貧可申雖愚可究減損周郁忠質為右 徇俗既非返古尤難事不駭衆義則稱先厥維艱哉損益之間 有弟勤經能誦三禮我將即之討定大指述作宗規以諭我里

榕村集卷三十六